



LUMINGU YATATU YA NGIZA A

(Is 35,1-6,10 / Jc 5,7-10 / Mt 11,2-11)

Bampangi ya munu na Yezo Kristo,
Yengeee!.....Nzolaaa!

Beto kena kukembela bubu lumingu ya tatu ya Ngiza. Dibundu mepesa beto nsungi yayi samuna ku kubika ban'tima ya beto na ku kembela lubutuku ya Yezo Kristo. Malembe malembe beto kena kupusana na kinzi ya Noël, kinzi ya luvuluzu ya beto, kinzi kenataka kiese na luzingu ya konso mukristo. Lumingu yayi ya tatu kena kotisa beto na kiese ya ngiza ya Yezo. Yau yina, Dibundu kena kubokidila yau **lumingu ya kiese**: beto yangalala samu luvuluzu ya beto kele na lubutuku ya Yezo Kristo. Yani natinaka beto n'temo, samu beto katuka na kitombe ya masumu.

Yengeee!.....Nzolaaa!

Beto mekuwa na lutangu ya ntete, nguza Izaya kena kutuba: «*Ntoto ya kuyuma mpe ntoto ya makanga kekuiza yangalala. Ntoto ya kuyuma kekuiza vuanda na kiese! Benoit siana, benoit mona wonga ve! Benoit tala Nzambi ya benoit kena kuiza samuna kuvuluza benoit.*

Bantu ya meso ya kufua kekuiza mona, bantu ya makutu ya kufua kekuiza kuwa, bantu ya kuvanguka kekuiza dumuka». Na kuwa bampova nionso yina, yau kena pesa beto kiese na kukembela Mfumu na beto Yezo Kristo.

Kiese to kiese veeel!.....Kieseee!

Bampangi ya munu, ntoto ya kuyuma mpe ntoto ya makanga yina metuba nguza Izaya kele luzingu ya beto bantu. Samu ba mbala mingi, luzingu ya bantu ya nkaka kefuananaka na ntoto ya kuyuma kebutaka diaka bambuma ve. Nionso mekumaka **mpasi na mpasi**: *kuzinga na bankundi **mpasi**, samuna kubaka kisalu **mpasi**, samuna kuvuanda na mavimpi ya mbote **mpasi**, samuna kubaka dikuela **mpasi**, samuna kusala “commerce” **mpasi**.* Luzingu meyuma samu **mpasi na mpasi**.

Nionso na luzingu mekuma neti na ntoto ya makanga: Konso kima nge zola sala kena kusimba ve. Luzingu yange mekuma neti ntoto ya kuyuma, na ntangu bantu ya nkaka kena kukuenda na ntuala. Nionso nge ke na sala kena pesa nge kyese ve; ke na pesa nge ata mbuma mosi ya mbote ve.

Kana luzingu yange mekumaka mutindu yina, Mpova ya Nzambi na lumingu yayi kena kulomba nge nakutula kivuvu na Nzambi, nakukubika n'tima yange samuna kutambula Yezo Kristo na kieleka yonso. Yezo Kristo ke bomba n'tima yange mpe ke sadisa nge na luzingu yange:

Yandi ketulaka kiese na kisika kele kiadi,
 Yandi ketulaka ntemo na kisika kele kitombe,
 Yandi kevutulaka kivuvu na kisika yau mezimbana,
 Yandi ketulaka nzola na kisika kele kimbeni.

Bakristo ya munu, na kukuiza na yandi nakati ya beto, Yezo Kristo kebaka bampasi ya beto mutindu yandi mosi tubaka yau: «Beno **kuiza na munu** beno nionso kele na bizitu ya mutindu na mutindu, munu kevundisa beno» (Mt 11,28)... (*kuenda kunua malavu? ve... kuenda kusosa min'kisi ? ve... kuenda na binzambi nzambi? ve...*). Kasi **kuiza na munu**... Yandi kena kuiza na beto, samu beto kuenda na yandi.

Beto vuanda na kiese samuna kubaka luvuluzu na lubutuku ya Yezo. Kasi beto zaba yau ti Kiese ya kinzi ya Noël kele samu na kudia to kunua ve!

Na lutangu ya zole santu Polo metuba: na kuvingila ngiza ya Mfumu, beno vuanda na **luvibudulu (patience)**. Beno tala ntete Kisadi ya bilanga: yandi kevingilaka tii kuna bambuma ya bilanga na yandi kebima. Yau zola monisa ti beto zaba kuvibidila na luzingu ya beto atako beto kele na bampasi.

Kasi bubu yayi luvibudulau kele diaka ve na luzingu ya bantu mingi!

Attention mpila mosiii !!!.....Keba!!!

Nge zola kaka nge baka mbongo nan'sualu, **sala attention!** yau kenata nge nakuvuna mpe nakuyiba, nakuvueza nzutu yange mpe nakufua bantu. Yau kele kiadi mingi na kutala mutindu bantuenia

mingi kena kubebisa luzingu ya bau kondua kuvibidila na luzingu: bau zola kaka kubaka mbongo na facilité, mingi kena kuenda na banzila ya bankisi, nge kena kukota n'soki na luzingu na nge.

Zaba kuvibidila na luzingu yange na kutula kivuvu yange na Tata Nzambi, yandi kepesa nge yina mefuana nange mutindu Mpova na yandi metuba: *beno zaba kuvibidila samu Nzambi kepesaka na konso muntu na ntangu yina mefuanana.*

Na nsangu ya mbote, Yezo kena kuzabisa beto ti yandi kena lungisa nionso yina tubaka bangunza: *Beno kuenda zabisa na Yowani nionso yina beno kena kumona mpe kuwa: bantu ya meso ya kufua kena kumona, bantu ketambulaka ve kena kutambula, bantu ya wazi kena kuvelelesua, bantu ya makutu ya kufua kena kuwa, mpe bantu ya kufua kena kufutumuka.*

Yawu zola tuba ti :

- Kana ngeke monaka ve mambote ya Nzambi na luzingu yange samu meso yange kele ya kufua, zaba ti Yezo kena kuiza samuna kutemona nge.
- Kana ngeke tambulaka kaka na banzila ya masumu, zaba yau ti Yezo kena kuiza sadisa nge na kutambula na banzila na yandi.
- Kana mabanza yange kele kaka ya kukota bantu n'soki, toma zaba yau ti Yezo kena kuiza kubelusa kimbevo yange ya wazi yina.
- Kana makutu yange mefulukaka na makelele ya inza yayi samu yau kekuwaka diaka Mpova ya Nzambi ve, zaba yau ti Yezo kena kuiza zibula makutu yange samu nge kuwa Mpova ya Nzambi mutindu bantu wilaka yau kilumbu ya Pentecôte.

- Kana ngekena tambula ve na banzila yina Nzambi kena monisila nge samuna kukota na luzingu ya kieleka, zaba yau bubu ti Yezo kena kuiza pesa nge luzingu ya kieleka. Yandi kaka kekatula nge na kitombe yina masumu mekotisa nge.

Yengeeee!!!.....nzolaaa!

Bakristo ya munu, konso muntu tala inki yandi fueete sala samu na kukubika luzingu na yandi. Inki nge fueete sala samuna kuvelelesa n'tima yange. Ntangu ya kubika luzingu ya kitombe mefuana, samuna kutambula ntemo ya Nzambi, yina ketuadisa nge mpe kepesa nge bansambu ya kuvuanda mbangi ya kieleka ya lubutuku ya Yezo Kristo na kati ya inza, na buala ya beto, naba paroisses ya beto, naba quartiers mpe naba familles ya beto. Bika nzola kuiza fuluka na ban'tima ya beto bantu samu beto tunga Dibundu, samu beto tunga kimpangi, samu beto vuanda bantu ya kiese.

Amen!